

Përschendetje të nderuar,

Në kuadër të raportimit të institucioneve në zbatim të procesit të monitorimit të sjelljes së nëpunësve civil gjatë fushatës zgjedhore, që është duke u realizuar nga Komisioneri për Mbikëqyrjen e Shërbimit Civil, nisur nga natyra e ndërtimit dhe veprimtarisë së institucioneve të pavarura, në kushtet kur ato udhëhiqen nga parimi i paanësisë politike, si edhe duke marrë parasysh faktin se nuk janë evidentuar në praktikën e mëparshme të monitorimit, në tipologjinë e institucioneve me risk të lartë, në drejtim të parregullsive në zbatim të ligjit, sa i përket përfshirjes së nëpunësve të tyre civilë, në veprimtari të ndaluara gjatë periudhës zgjedhore, Komisioneri vlerëson se, për këto institucione, akti i konstatimit, duhet të dërgohet i përmbledhur, në datën **12 maj 2025** dhe duhet të përmbajë të dhënat e mëposhtme, për periudhën 11 prill 2025– 11 maj 2025:

- ✓ Rastet e emërimeve të reja në punë, në pozicione të shërbimit civil;
- ✓ Rastet e pezullimeve në shërbimin civil, për arsye të ndryshme;
- ✓ Rastet e dorëheqjes nga shërbimi civil;
- ✓ Rastet e largimeve nga shërbimi civil, si nëpërmjet aplikimit të masës disiplinore, ashtu edhe për shkak të dy vlerësimeve negative;
- ✓ Rastet e masave disiplinore të ndryshme;
- ✓ Rastet e nëpunësve civilë të emëruar në organet zgjedhore, që janë: KZAZ, KQV, GNV dhe aktet e miratimit nga ana e institucionit për këtë veprimtari;
- ✓ Rastet e nëpunësve civilë që kandidojnë për deputetë në Kuvendin e Shqipërisë, shoqëruar me aktet e pezullimit të tyre nga detyra, miratuar nga institucioni;
- ✓ Rastet e denoncimeve në lidhje me probleme që kanë të bëjnë me parregullsi në drejtim të zbatimit të ligjit nr. 152/2013, “Për nëpunësin civil”, i ndryshuar, për këtë periudhë dhe mënyra e zgjidhjes së tyre;
- ✓ Rastet e kallëzimeve penale, nëse evidentohen për nëpunës civilë në institucionin përkatës.

Grupet e monitorimit, sipas rastit dhe sipas institucioneve përkatëse, duhet të vendosin vetë për mënyrën se si do ta kontrollojnë prezencën në punë të nëpunësve civilë për këto institucione gjatë periudhës zgjedhore dhe duhet të dërgojnë pranë Komisionerit, informacion vetëm nëse ka raste që duhet të trajtohen si shkelje të disiplinës në punë, për shkak të mungesave të pa justifikuara, apo për shkak të veprimtarive të ndaluara gjatë periudhës zgjedhore.

Ndërkohë, të gjitha institucionet që ende nuk e kanë funksional Komisionin e Disiplinës, ky organ duhet të ngrihet menjëherë, duke përfshirë në të nominalisht 3 anëtarët e përhershëm, të përcaktuar në aktin nënligjor përkatës, ndërkohë që 2 anëtarët e tjerë, që përfaqësojnë eprorin direkt dhe nëpunësin më të vjetër të njësisë ku punon nëpunësi i proceduar, do të materializohen në akt me pozicione pune, pasi ata do të caktohen nominalisht, rast pas rasti.

Të dhënat e kërkuara më sipër do të dërgohen në adresën zyrtare të personit të kontaktit të ngarkuar nga Komisioneri, për institucionet e pavarura: @kmshe.al.

Në përfundim të këtij njoftimi, sjellim në vëmendjen e Grupit të Monitorimit, se mbikëqyrja e sjelljes së nëpunësve civilë gjatë periudhës zgjedhore, është një proces shumë i rëndësishëm dhe situata e konstatuar nga organizmat e ngritura në këtë rast, do të pasqyrohet në një raport të

posaçëm vlerësimi. Për këtë arsye, raportimi nga ana juaj duhet të bëhet me një nivel të lartë **përgjegjësie** dhe **përgjegjshmërie**, në raport me vërtetësinë e tyre, pasi të dhënat e dërguara nga ana juaj do të jenë baza e konkluzioneve që do të dalin nëpërmjet këtij raporti.

Po kështu, në bazë risku, këto të dhëna do të verifikohen nga ana e Komisionerit dhe parregullsitë e konstatuara në raportimin e tyre do të përbëjnë shkak për të kërkuar ecuri disiplinore, ndaj personave përgjegjës.

Duke ju uruar punë të mbarë dhe duke ju falënderuar për bashkëpunimin deri në këtë fazë të procesit, ç`ka pasqyrohet në një nivel shumë të lartë mobilizimi nga ana e institucioneve për ngritjen e Grupeve të Monitorimit, *(201 institucione të administratës publike që janë pjesë e sistemit të shërbimit civil, ose 100% e tyre e kanë funksional tashmë këtë mekanizëm dhe **688** nëpunës civilë, janë aktivë në përbërje të këtyre organeve)*, Komisioneri do të vazhdojë komunikimin përgjatë gjithë periudhës zgjedhore për të ndihmuar institucionet të zgjidhin problematikat që shpesh paraqiten gjatë proceseve të tilla, në raport me zbatimin e ligjit për nëpunësin civil.

KOMISIONERI